

雞肋集

濟北晁先生雞肋集目錄

第六卷

古詩

玉溪歸逢甥李相如汴中

送學生李公裕兄弟赴省集

次韵太學舒博士堯文示同志

次韵蘇翰林五日揚州石塔寺烹茶

題四弟以道橫軸畫

桂漿

送舅氏楊通直令陽穀

贈王推官允中

之京師展墓

同畢公叔飲城東

題李成季負日軒

次韵李成季感事

同李主簿叔文飲北莊

夏季

曹州道中二首

病起呈李縣令希孝

贈金堤劉承制景文

次韵四弟以道十二弟叔與法王唱和兼
示无斃弟二首

濟北晁先生雞肋集目錄

終

濟北晁先生雞肋集卷第六

古詩

玉溪歸逢甥李相如汴中

蠻鄉俟天形畏蠹復憚暑夢甥來萬里竹響風動
字如今真似夢相對別恨吐平生窘執轡白面力
如虎誰令斗指日江使墮漁罟桃僵李爲什遺珮
滿江渚常憂抱石死無復腳踏土邨知微時願起
廢遇明主曠調已遠跡未用矜杜舉但憂世議隘
亡弓不亡楚吾甥學孔子况乃父母魯如聞四門

闢未信遡洞沮上書閔魑旱膏以神靈雨北海自
有人高丘豈無女爾壯觀爾能吾歸固吾所期甥
二兒上餘子不足數何以喻吾心酌此湘吳醕

送學生李公裕兄弟赴省集

閉門圍火談開戶雪一尺黃昏具盃酒知君遠行
役君家三兄弟頗謂各無敵容父學知方大道通
四驛吉父尤頡頏天池觀水擊仁父少而奇乃是
夜光璧李侯有此子便可臥安席家居樂與餌聊
以止過客豈無一束芻空谷不可食宵人操寵利

徒手捕蜴蜥公等寧復然烏黑鵠自白屠龍業有
用未厭所從僻富貴念管時城東雪中跡

次韵太學舒博士堯文示同志

北門望瀛關一葦初莫渡

頃官大名堯文在高陽

儒宮連案

几會合豈非數蟬鳴幾何時庭菊下白露念當慰
佳節觴酌美無度不然坐歲晚流景急飛兔區區
人一馬官舍勤早算經時枉見贈彌月不能賦竹
齋行茗粥寂莫當屢赴此君安可得霜雪不改故
詩如戰交地高處要先據牛羹君放飮轅鼎吾亦

飫顧慙詠伐檀無補餐已素還家便却埽況乃無
戶屨

次韵蘇翰林五日揚州石塔寺烹茶

唐來木蘭寺遺跡今未滅僧鍾嘲飮後語出飢客
舌今公食方丈玉茗攄噫噎當年臥江湖不泣逐
臣袂中和似此茗受水不易節輕塵散羅趨亂乳
發甌雪佳辰雜蘭艾共弔楚纍潔老謙三昧手心
得非口訣誰知此間妙我欲希超絕持誇淮北士
湯餅供朝啜

題四弟以道橫軸畫

黃葉滿青山枯蒲靜寒水鳬雁下坡塍牛羊散墟
里擔穫算來歸兒迎婦窺籬虎頭無骨相田野有
餘思

桂漿

暑臥午呀呬蠲煩何所投巖桂割辛芳石蜜滋甘
柔沃以火鼎沸悶之冰井幽三日出淡晡明瓊盎
黃流冰火離坎類意比秣麥繆辛甘旣兩適不漚
亦銷憂中年苦內熱歲願西風秋寒涼犯所畏發

散資爾謀時時以觴客三獻不一酬緬思湘纍語
啜醕終所羞北斗酌此漿違世聊遠遊恐復迷吾
往僕悲道阻脩淮南歸來些慄慄令人愁百壺無
此餞夙志慕林丘寧懷小山感不爲桂枝畱

送舅氏楊通直令陽穀

人言慎縣宰頗似太丘君客戶有訓遣司官無訟
聞外家久寂莫舅氏少辛勤一邑何足道高名誰
與羣西來馬特特冬晚雪紛紛公朝道由砥孤士
跡如雲過門苦地僻下直迫日曛淡泥枉窮巷寒

鑪對殘燭感慨說宣子飄零綴遺文麟閣窘鉉槩
魚山失耕芸遠情等匏繫歸夢劇絲棼山東接畿
甸陽穀近榆枌吏胥猛豺虎民如竄麋麋幸逢寬
大時庶幾仁惠薰自笑下士策不殊野人芹愛民
宜百祿本茂實當蕢

贈王推官允中

我生譬天星睨睨但空譽學經羞輪扁常恐老竄
句南游上會稽弱冠肆遠步便當期汗漫如鳥鍛
脩羽入宮又獨晚謠詠遭衆嫗坐令平生交室冷

羶不具君公牆東客清鑒美無度風期山水意千
載見此遇定疑丹青仙方我以癡顧豈繫才自疎
閱世真異趣伐柯理無遠要以一馬喻古人本不
死方寸有佳處三年禹河曲日見車馬渡何知謝
剝啄黃土衣易汙無人尚有子獨載城下路功名
喧口實簪組託肺附請看餅罌滿取蹟病不去脫
黏窺本初須子遺所寓怵迫倦東西林間尚寬裕
之京師展墓

短轡馭羸馬馳驅曹濟間商飈折勁木蕭瑟道里

寒況復慕所天惻愴摧心肝游子歎時邁慈母憐
衣單來時憑窗哭五妹垂脩鬟季弟主菽粟孺妻
裹茅菅悼我無令人莫奉堂上歡豈無萱草詩終
日倚門闌念管常獨立所聞詩禮難我尚未成人
遭罹此憂患歲晏念墳墓此離百哀攢何時奉靈
車辛苦向此還親寡氣力微傍人祝加餐願言薄
志節苟生無形顏

同畢公叔飲城東

西城昔相值桃初兩三紅翩翩驚長陌春風搖馬

髻後君歸幾日游絮已濛濛解鞍不待憩相命古
原東芍藥雖俗花狂姿幸時供平生於知己千過
不一逢感君欲開口清淚出霑胸君如陶淵明不
爲五斗恭胡爲青綸上朱墨紛外蒙棄官能從我
短後追田翁銅斗釀秫麥竹枝弋鳬鴻何必悲無
衣緼賡聊御冬九辯太高潔五噫苦羈竊置此無
滑和天情反其中市藥非市名名聞藥何庸十漿
饋五漿猶畏聞者從如何艷城畔夜夜生長虹

題李秀才成季負日軒

李自號
天隨子

盧敖遊八極末至北陰墟卒然蒙谷幽覩一奇丈
夫淚注而鵠肩深目玄髭須軒軒迎風舞自得樂
有餘見敖默弗言慢然下臂趨敖私躡其後若士
意不愉曰子亦何爲迷繆至此乎此雖窮荒北尚
或逢日鳥過是有玄關晦墨不可居語竟若欺魄
攝身沒空虛始予讀秦記疑是忽帝徒今聆天隨
言乃與夸父俱逐日下虞谷力窮尚嗟吁陽舒固
物理我亦安于于若士獨何氣幽沈山海隅渾沌
死已久人生信多塗

次韵李成季感事

吾廬無餘地文字散堆案雖微清溪鶴著畫亦幽
玩高人來何疎午榻動成軒夢聞足音喜不待搖
枕喚居貧少煙火餽食尚須肝出門兀何之踉蹌
從欵段吾人古遺隱鳬足閔同患負日持獻君狐
白不肯換商歌叩牛角長夜安得旦颼颼滿屋風
黃葉散投幔楚屈若靈龜出處思過半所從聊自
知何用詹尹算不如天隨生頭幘終日岸況君擊
莊缶一念腸九轉人方臥大室子獨號其畔寒山